

# Evesasi

---

## Bolou Evesasi ekalesiaho hisaliale

**1** <sup>1</sup>Dau di ivilike Bolo. Dilava isivimo di Iesu Keliso abostolo holisi lovive vama. Dilava ataaeu Evesasi oe umale la kebiahoike di levaleva ko hisaliai hanavonu. Di hilokage la keau la evievimo negolahai Iesu Kelisomo uma. <sup>2</sup>Iale di isivialeike nahie Mama Dilava isi nahie Kosive Iesu Keliso keau la huhuevei la hoesegeve lana ue dua vave.

### Dilavau Iesu Kelisomo nahie malevenu.

<sup>3</sup>Di isivialeike nahi nahie Kosive Iesu Keliso ke Mama Dilava hoesehavoi. Kosealemo keu Iesu Keliso hanavoale kemo nahie hoesegeveime otogoe vuvune bahata nahiovege keu nahie uvu negotievenu. <sup>4</sup>Dilavau vata vaholisito nahi huhuevei isivialeike Iesu Kelisou nahie malevege nahi atave holisi. Keu isiviale nahie vaveve hoesegevege nahie uvevena nivemo inutolotoloi. <sup>5</sup>Dilavau nahihio isivi balugale kemoike au nahie huhuevei isivialeike Iesu Kelisou nahie malevege nahi atave holisi. Dilavau au isivi unahamo vaveve kateale vanu. <sup>6</sup>Iale nahi ke hoesehavo dua vai. Kosealemo keu au uvu bahata mai nahiovenu. Isi au ibinavesite au uvue mo mai nahiovege nahi kemo atave holilu.

<sup>7</sup>Iesuu au tahota nahie toela ibina vage Dilavau nahie toela bahata ulihanu. Dilavau au uvu mai nahioveale keu balugataho seleve. Kemoike au nahie toela ulihanu. <sup>8</sup>Au au uvu bahata mai nahioveale kemoike nahi vaveveve hilokai lulelelahalu. <sup>9</sup>Nahi subuta vaveveve kemo luleleholilu. Isito au aike au isivimo nahie haivege au gabie Iesuemo vadeu vaveve ke nahi hilokalu. <sup>10</sup>Nahi hilokage Dilavau louale vani kena lohogé otogoe umale isi vatamo umale keabuna bahata Iesu Keliso ke adae valamo igaetoai ui. Ige auna kebia bahata Kosive holisi.

<sup>11</sup>Iesu Keliso kemoike Dilavau nahihio onobenobe otoveale ke nahiabuna malei. Kosealemo Dilavau subuta nahie huhuevei nahi tabagevege nahi aike atave holilu. Keu subuta au isivimo onobenobe bahata huhuevei avoe, “Koeabuna katelaha.” <sup>12</sup>Keu kateai nahi

tabageveale kemo no oleuoleu vasohuta Iesu Keliso huhulahai ehovale noeabuna Dilava hoesehavoi ivive ebagevai.

<sup>13</sup>Ige lata katelahave. Kosealemo no subuta hotoe dua loui la haivege la ke eviale kemo lana ukolikoli maleve. Ige Dilavau au subuta louale Munanae Tumu ke laovege la kemo hilokage laeau atave selevea.

<sup>14</sup>Dilavau au Munanae Tumu nahioveale kemo nahi hilokage nahiabuna gabie Dilavau nahiho onobenobe otoveale ke malei. Isi kemo nahi hilokage Dilavau nahie toelae ibina vale kemo auna lohoniege nahie malevei. Katealemo nahi Dilava hoesehavoi ivive ebagevai.

### Bolou ekalesiaho Dilava imihamale deiada

<sup>15</sup>Di evige la hoto seleve ke evisi nahie Kosive Iesu Keliso ke ehovai Dilava ata bahataho isivilahai kebia tedaevema. <sup>16</sup>Di hoto ke evisi vahaehoai vani bahata laheho Dilava imihai guliguliamma. <sup>17</sup>Di laheho guliguliamai nahie Kosive Iesu Keliso ke Mama imihama. Dilava keu atagae Mama. Iale di ke imihai isivialeike keu au vaveve la haivei negotievege lana kemo lulelelahai vaveveve hilokave. <sup>18</sup>Di imihai isivialeike au la uvu alavoi lulele laovege lana kemo au la hohavei laheho onobenobe otoveale ke hilokai huhulahai uve. Dilavau au ataho onobenobe otoveale keau balugataho. <sup>19-20</sup>Di guliguliamai isivialeike la hilokage Dilavau vuvune baluga mai evievi ata nahiovenu. Iesu Kelisou hatige Dilavau hatihatimo etuvale vuvune keu vuvune ke nahate. Keu vuvune kemo Keliso mai otogoe au ada inuteveatae mamoru. <sup>21</sup>Ige keu keve ui otogoe ata isi vatae kosive kebia bahata evigewe Kosive baluga holinu. Iale oleuoleu vatae vuvune malei otogoe vuvune maleale keau bae ke evihalivebene. <sup>22</sup>Dilavau onobenobe bahata malei velove heimo otovet ebagemage keu onobenobe bahata nalisi ekalesia bahata kebia kina holinu. <sup>23</sup>Ige ekalesia keau Iesu vava nahate. Ige Iesu keu ekalesia bahata kebia kina. Iale kena ekalesia kebia bahata vuvune ovege abuna avu nahate vasegi.

### Nahi Kelisomo uveve doga malelu.

**2** <sup>1</sup>La subuta Dilava hoto evioholisi vaveve toela vamale kemo laeau haluviale ke nahate valu. <sup>2</sup>Vani kemo la vatae vaveve ehovai Vatae Kosive ke isivi vama. Vatae Kosive keu ata oleuoleu Dilava hoto evioholimale kebia nibievema. <sup>3</sup>Nahi bahataeau subuta ui kebiahi vaveveabe ke nahate vama. Vani kemo nahi nahie vavae isivi vai huhuihuhiu toela unaha huhuievema. Nahi ata kebia nahate vai uvue isivi vamale kemo Dilavau nahita kebiataho itumuanu.

<sup>4</sup>Isito Dilava keu aike nahiho uvuai nahiho isivial nahi tedaeveale keu balugataho. <sup>5</sup>Katealemo nahi subuta vaveve toela vai haluviale ke nahate vasegi Dilava keu Keliso hanavoge keu nahie tedaevege nahi kemo uveve doga malelu. Dilavau au uvu bahata mai nahioveale kemoike

au nahie toelamo nahie malevenu. <sup>6</sup>Iesu Kelisou nahie tedaeveale kemoike Dilavau nahi tabagevege nahiabuna Iesuluvuta tiliege otogoe igaetolahai ui. <sup>7</sup>Dilavau au uvu mai nahie ovei Iesu Kelisomo nahi tedaevi isiviale ataeau aike umale isi gabie uveve keabuna bahata hilokage Dilavau kateale nahiemо vale keu balugataho. <sup>8</sup>Dilavau au uvu nahiovei nahie toelamo nahi maleveale kemo nahi hilokage Dilavau nahiho isivi baluganu. Isito nahi hilokage Dilavau nahie vavevemo nahi maleveholisito au isivimoike nahi malevenu. <sup>9</sup>Nahi uveve doga maleale kemo nahi nahie ebika tabageve halevai. Kosealemo nahi vadeu vamale kemo Dilavau uveve doga ke nahioveholinu. Isito au isivimoike au ke nahiovenu. <sup>10</sup>Dilava keike Iesu Kelisomo nahi malevei uveve dua nahiovenu. Au kateai isivialeike nahi atave holisi vaveve dua vai au subuta lovi vadeu nahiho mamoale ke nahi vai.

### **Nahiau Iesu Kelisomo mole nahate unaha.**

<sup>11</sup>Di hoto mole louge evive. Laeau Diue ata holioholilu. Iale Diue ataeabuna la matitigevi la ivi aiohavoi laheho loui kosea, “Noeau vaveve dua vai no vudie vate bohilu. Isito laeau no vale ke nahate vaholilu. Iale kemo laeau Dilava ata holioholilu.” Keabuna laheho kateai loui. Isito vaveveabe keu atae vaveve unaha. Iale la subuta vale ke huhulahave. <sup>12</sup>Vani kemo la Kelisoluvuta igaetoholilu. Dilavau subuta Diue ata tabagevege abu atave holilu. Isito la keau ata molea. Dilavau subuta Diue ataho hoto loui mamoi avoe, “Dana la hoesegevege lana ue dua vave.” Isito la kebiaho hoto kateale louoholinu. Kosealemo laeau vatae vaveve vai gabie otogoe tiveve ke huhulahaholisi Dilava hilokaholilu. <sup>13</sup>La subuta Dilavamo haevamole. Isito Iesu Kelisou hatiale kemo Dilavau la malevege la aike avuluvuta igaetolahai ua.

<sup>14</sup>Iesu Keliso kemoike nahi bahata molehi ue dua vama. Subuta Diue ata isi Diue ata holioholiale keau moleho itumulahai mole tasalievei lilikate ua. Isito Iesuu aike humaha alavoge keu koseanu. Diue menaka kemo Diue ata isi Diue ata holioholiale keau molehi ugologoloai ua. Iale Iesuu au hatihati kemo Diue menaka ke vuvune aiohavoge uoholinu. Keu kateai isivialeike Diue ata isi Diue ata holioholiale keau avuluvuta igaetoiata igae holisi. Katealemoike nahi molehi ue dua vama. <sup>16</sup>Nahi subuta molehi igaetoholisito molehi ue toela vama. Isito Iesuu idie domo hatiale kemo isiviale Diue ata isi Diue ata holioholiale nahi bahata vava igaemo molehi igaetolahai Dilava ata holisi ue dua vai. <sup>17</sup>Iesu Keliso keu dobai lohoi hotoe dua louale kemo au isiviale Diue ata holioholialeau Dilavamo haevamole umale isi Diue ataeau Dilava vavamo umale keau bahata molehi uveve dua vai. <sup>18</sup>Katealemo Iesu humaha alavoge nahi bahataebuna Munanae Tumuluvuta humaha igaela nahie Mama Dilavae tai.

<sup>19</sup>Katealemo Diue ata holioholiale la keau haeavabia holioholilu. La subuta ata mole holilu. Isito Dilavau aike la malevege la atavehi igaetolahai ese igae holilu. <sup>20</sup>Di louale keu koseanu. Laeau Dilava o nahate. Iesu Keliso keu hade tolote nahate. Ige abostolo isi beloveta keau hadee golomo idi hatuale ke nahate. Isege laeau idi ke golomo o houi etatavoale ke nahate. <sup>21</sup>Iesu keike o ke bahata hadebige keu negoai lamisi balugai ui o tumute holige Dilavau avuemo ua. <sup>22</sup>Iale laeau Dilava o tumute ke nahate. Iesu Kelisou la malevei la negotievege la molehi igaetolahage Dilava Munanae Tumu lahehi ua.

### Bolou Diue ata holioholialebiaho loviale deiada

**3** <sup>1</sup>Dilavau au lovi mai daoge di Iesu Keliso ivimo lovi ke vai Diue ata holioholiale la haivema. Di lovi ke vaise valage abu di mai dibulae mavolu. <sup>2</sup>Di huhuige laeau di vamale deiada ke evilu. Dilavau au uvu mai daoi au lovi ke mai daoge di lovive ke vai la tedaevetu. <sup>3</sup>Dilavau au subuta au hoto nehe mahogovale ke loui di haivuge di ke hilokaike vaime laheho levaleva komo benahatehame hisalianu. <sup>4</sup>Lana di levaleva ko dodaveliege Dilavau subuta Keliso vaveve mahogovale kemo di luleleale ke hilokave. <sup>5</sup>Dilavau subuta vaveve ke loui ata haiveholinu. Isito au aike au Munanae Tumu hanavoge keu hoto ke loui au abostolo tumute isi au beloveta tumute kebia haivege abu ke hilokalu. <sup>6</sup>Au subuta mahogovale hoto keike ko. Iesu Keliso hotoe dua keu Diue ata holioholiale kebiae tige keau ke evisime Diue atahi igaetolahai ata igae holige Dilavau kebia bahata hoesgevenu. Katealemo Diue ata holioholiale keabuna Diue atahi igaetolahai Iesu Kelisomo Dilavau au ataho louale ke abuna malei.

<sup>7</sup>Dilavau di ebagemai au uvu mai daoge di esemuve holisi vuvunene balugamo hotoe dua ke loui ata haivema. <sup>8</sup>Di lovi ke vaito di huhuige dau Dilava ata kebiamo baluga holioholinu. Dau kebia valae ua. Isito Dilavau di ebagemai di hanavoge di Diue ata holioholiale kebiae tiniale Iesu Kelisou abuho onobenobe dua vamale ke bahata loui haivenu. Iesuu abuho vile vale moaga otoveale ke nahi bae dodavelivebene. <sup>9</sup>Dilavau isiviale di ata bahata haivege abu kemo hilokage Dilavau ata bahatamo au ata malevema. Dilava keike vata vai onobenobe bahata vaeveito au ata bahatamo au ata maleveale ke mahogovai subuta ata kebia namigeveholinu. <sup>10</sup>Isito Dilavau aike ata bahatamo au ata malevei isivialeike abu ekalesia holige otogoe vuvuneteau isi aneluiau ke elehai hilokage Dilava keu kemo lulele baluganu. <sup>11</sup>Subuta vatau uoholisege Dilavau Iesu vaveve ke huhuai halege ua. Iniale vani mole au louge nahie Kosive Iesu Kelisou hotove ke mai selevetinu. <sup>12</sup>Ige nahi nahie uvu mai avuemo mavoale kemo nahiabuna avuluvuta igaetolahai vabuoholisito negolahai Dilava imihagei. <sup>13</sup>Katealemo di la namigevege evive. Lainaho di aike vatehani maleale ke huhulahai negoholilive. Isito negolahave. Kosealemo di la tedaevelihoike vatehani ko malenu.

### Bolou tota ekalesiaho guliguliale deiada

<sup>14</sup>Dilavau au uvumo Iesu vaveve huhuale kemoike di kome bokoi vata bisi nahie Mama ke imihama. <sup>15</sup>Dilava kemoike otogoe umale isi vatae umale evievi ata bahata keau ivive malu. <sup>16</sup>Nahie Mama Dilava ke vuvuneu balugataho. Keu otogoe ui onobenobe bahata ke kina. Kemoike di ke imihai isivialeike au au Munanae Tumu laoveale kemo vuvune laovei la uvu mai negotige lana kemo negolahai ugeve. <sup>17</sup>Lana la evievimo negolahai uge Kelisona la uvumo ui tigei. Di laheho guliguliae isivialeike la moleho isivilahai mole tedaevemale vaveve keu laemo balugage idie alumuu vatae uvue dobai tige idiu negoale ke nahate lana negolahave. <sup>18</sup>Lana katalahaliege Dilava ata bahatahi Kelisou laheho isiviae la tedaeveale ke hilokai lulelelahave. Kelisou laheho isiviale keu eseve holioholinu. Isito isivive keu balugataho. <sup>19</sup>La bae au laheho isiviae la tedaeveale ke bahata hilokalivebene. Isito Kelisou laheho isiviae la tedaeveale ke lana kaovai hilokage Dilava vaveve bahatana laemo balugai. Katealehoike di vani bahata guliguliae laheho Dilava imihama.

<sup>20</sup>Dilava keu negote. Ke vuvuneu nahie uvumo ua. Iale mesoho nahiabuna vadeu huhulahai imihage keu bae avuemo isualivebene. Isito auna nahie isivi ke evihai moaga nahiovei. <sup>21</sup>Dilavau Iesu Keliso hanavoge ekalesiaho humaha vale kemo nahi vani bahata ivive ebagevai hoeshavoge ivivena vani bahata balugai ui tigei.

### Nahi Munanae Tumue vuvunemo igae holilu.

**4** <sup>1</sup>Di la namigevege evive. Di Kosive lovi vamale kemoike abu di mai dibulae mavoge di aike kove ua. Isito di isiviale Dilavau la hohavei uveve dua laoveale kemo negolahai vaveve dua vaseve. <sup>2</sup>Lainaho la ebika tabagevelive. Isito mole huhuevei mole hoesgegeve. Lainaho moleho itumulalahalive. Isito moleho isivilahai mole tedaevegeve. <sup>3</sup>Munanae Tumu la malevege la ata igae holiale kemo negolahai molehi igaetolahai ue dua vaseve. <sup>4</sup>Munanae Tumu igaeu nahie malevege nahi Iesuluvuta vava igae holisi otogoe tiveve ke igae hululahama. <sup>5</sup>Nahie Kosive ke igaeu balugalemo avuemo evievi igae, babatisoe humaha igae. <sup>6</sup>Ige Dilava keu nahie Mama igae. Isi nahi bahatae Kosive. Keu vani bahata nahehi ui nahie negotievema.

<sup>7</sup>Kemoike nahi bahata ata igae. Isito Kelisou au vuvunemo au lovi igaege nahiovemu. <sup>8</sup>Keliso vaveve kemo Bukae Hotou koseale lounu. Avoe, “Au ehudae taliho Seteneu atave aiogevemale kebia toelamo haliohatuito lovi igaege au ata ovemu.” Bukae Hoto keu kateanu. <sup>9</sup>Isito au ehudae tiale ke ihuike vadeu. Ke ihuu koseanu. Keu vasohuta au o halei vatae dobai lohonu. <sup>10</sup>Dobai lohoale ata nehe ke igaeike tota hoilahai otogo bahata evihai au oe tinu. Keu keve tiale onobenobe bahata

ke baluga holisi nibievema. <sup>11</sup>Iale Keliso keike au isivie lovi igaegae ata ovenu. Keu kebia tabagevei vuvune ovege degomoleau abostolo lovi vama. Isege degomoleau beloveta lovi ke vama. Isege degomoleau o igaegae ohanoi ata haivemale lovi ke vama. Isege degomoleau ekalesia nibievemale lovi ke vama. Isege degomoleau ata haivemale lovi ke vama. <sup>12</sup>Keu kebia tabagevei vuvune ovei isivialeike keau lovi ke vai atave haivei tedaevege abu abu evievimo negolahai Keliso ata degomole haivege keabuna negolahai. <sup>13</sup>Keabuna katalahage nahiabuna bahata igaetolahai nahie evievimo negolahai Dilava mo ke vavevemo hulelelahai. Nahiabuna katalahage nahie evievi kena balugage nahie vavevena Iesu vaveve nenita ui.

<sup>14</sup>Katealemo nahi bae nahie evievimo esebulue vaveve nahate valivebene. Loboé ata keabuna lohoi esebulu lobogevege abuna hotoeabe evisi mai. Isito nahi kate halevai. Mesoho loboé ataaeu lohoi hoto nimolete loui nahi lobogevege nahi hotoeabe ke ma halevai. <sup>15</sup>Nahi ke ma halevaito hoto seleve loui moleho isivilahai mole tedaevei. Nahiabuna katalahaliege nahi baluga Keliso ke vaveve bahatamo negolahagei. <sup>16</sup>Keliso keu ekalesiae kina nahate. Ige ekalesia keau vavave nahate. Nahie vavamo nahie ada nahie velo nahie ni keabuna kinae isivi unaha vasei. Ke nahate nahi igaegae Keliso valamo uale kemo nahiabuna lovive vai moleho isivilahai mole tedaevege ekalesiae vaveve kena negoai.

### Nahi uveve doga malemo vaveve dua vai.

<sup>17</sup>Katealemo di Kosive ivimo hoto loui la haivege evive. Lainaho bae evievi ata holioholiale kebia vaveve nahate valive. Kosealemo keau huhuihuhiue dua vaholilu. <sup>18</sup>Keau katalahage vavie vaveve ke unahau abuemo ua. Uvuiabeu toloige keau Dilava hotomo luleleholiale kemo abu bae Dilava ukolikoli malelivebene. <sup>19</sup>Nahiabuna ata katealebia vaveveabe toela abuho loui haivege abu bae matilahalivebene. Kosealemo keau abu uvu mai vaveve duamo mavoholisito abu uvu mai vaveve toela unahamo mavoale kemo abuna ke unaha huhulahai vasei. <sup>20</sup>Keau katalahama. Isito laea Iesu Kelisomo vaveve katealebe evioholilu. <sup>21</sup>No subuta tiale Iesu hoto seleve loui la haivege la ke evisi malu. <sup>22</sup>Katealemo lainaho la subuta vamale ke vagelive. La subuta vamale kemo vavae isivi keau la lobogevei la aiogevema. <sup>23</sup>Kate halevaito uveve doga huhulahai la uvu nenigeveme. <sup>24</sup>Kosealemo Dilava keu tumute. Ige vaveveve keta inutolotoloanu. Keu uveve doga mai laoveale kemo la vaveve hoesgevei Dilava vaveve nahate vai ugeve.

<sup>25</sup>La bahata lainaho mole lobogevelive. Isito hoto seleve loui mole hoesgeveve. Kosealemo nahi bahataeu ata igae ataea. <sup>26-27</sup>Mesoho la itumulahaliege lainaho la itumu ke vai ulage vaniu dobalive. Lana ke mai egetiliege vaveve toela vai Seteneho humaha alavove. <sup>28</sup>Di isiviale ata

oleuoleu vavoloamale keau vavolo halevaito lovilahalive elike moni malei abu ebia tedaevei ata degomoleau kunaiholimale kebiata tedaevei.

<sup>29</sup>La molehi hotohotoaliege lainaho hotoe toela lougelive. Isito hotoe dua unaha lougeve. Ilive elike ata degomole aiogeve halevaito kebia hoesegevege keabuna la hoto kemo negolahai ue dua vasei. <sup>30</sup>Lainaho la vavevemo Dilava Munanae Tumu mai uvutilive. Kosealemo Munanae Tumu la uvumo uale keu Dilava hisai nahate. Kemoike la hilokage Dilavana vani mole bae la malevei au matamae tai. <sup>31</sup>Lainaho mole toela ke huhu vololoai moleho itumulahagelive. Isi lainaho atae nimo mole vaveve loui moleho hotoe toela lougelive. Lainaho huhuihuwie toela kateale vagelive. <sup>32</sup>Isito mole huhuevi vaveve dua vai mole hoesegeveve. Ata moleu laemo vaveve toela vase lainaho ke ibina valive. Isito Dilavau Iesu Kelisomo la vaveve toela ulihale ke nahate mole toela huhu halevaito ke momahavove.

### Nahi uveve doga malemo atagae vaveve vai.

**5** <sup>1</sup>Laeau Dilava uvue esea. Katealemo negolahai ehovai vaveveve nahate vave. <sup>2</sup>Kelisou nahiho isivai au ebia mai nahiovei nahiho hatiale keu abu subuta ovo mai Dilava nimo mahoge au ke elehai vahaehoale ke nahate. Iale Dilavau Keliso vaveve ke elehai vahaehove vanu. Ige Kelisou vale ke nahate nahita vai moleho isivilahai mole tedaevegei. <sup>3</sup>Laeau Dilava ataea. Katealemo vaveve toela bahata halevave. Lainaho molemo teibae vaveve vagelive. Isi huhuihuwie toela vagelive. Isi lainaho mole kunai elegevei isivi omigelive. <sup>4</sup>Isi lainaho vaveve toela hoto ke loui hotou ihuholimale keta lougelive. Hotoe toela kateimale lou halevaito hotoe dua unaha loui Dilava hoesehavogeve. <sup>5</sup>La hilokage ata oleuoleu vaveve kateale vai molemo teibae vaveve vai vaveve toela unaha huhulahai mole kunaiho isivilahamale keau bae Dilavau Kelisoti umale matamae doga keve talivebene. Ata oleuoleu mole kunaiho isivi balugamale keu kunai kena dilavaeabe holisi. <sup>6</sup>Mesoho ata moleu la uvu isi la lobogevei loui kosea, “Vaveve kateale vale keu duave.” Abu kateale louge lainaho hotoeabe evisi valive. Kosealemo ata oleuoleu Dilava hoto evioholisito vaveve toela kateale vamale kebiaho Dilavana itumu balugai. <sup>7</sup>Iale lainaho ata katealebiah igaetolahai vaveveabe nahate vagelive.

<sup>8</sup>La keau subuta vavimo ui vavie vaveve vama. Isito la nova Kosive ese holisi atagamo ua. La Kosive ese holialemo atagae vaveve vaseve. <sup>9</sup>Ataga kemo vaveve koseale abuna lohoi. Vaveve dua, vaveve inutolotolote, isi hoto seleve. <sup>10</sup>Iale hovedevei Kosive mai vahaehotiveve vaveve ke kaovai vaseve. <sup>11</sup>Lainaho ono moleu ihuholiale ke vagelive. Vaveve katealeu vavie vaveve. Iale lana atagamo ui vaveve kateale bamuge keu bae laemo loholivebene. <sup>12</sup>Ataeau vavie vaveve kateale vai mahogovale

vaveve keau toela balugale kemo lainaho vaveve toela kateale loui mole haivegelive.<sup>13</sup> Isito vaveve ke bahata bamuve. Kosealemo Kosive atagamo vaveve keabuna bahata bae umidamo ui. Ige Kosive atagamo lana bae vaveve ke elehai hilokage vaveve oleteu duave, vaveve oleteu toelave. <sup>14</sup>Katealemoike Bukae Hotou loui avoe, “Ladevemale ataea, hovedeveve. La keau haluviale nahate. Iale hovedevege Keliso atagau laemo halui.”

<sup>15</sup>Hoto katealemo la uveve nenigeveve. Lainaho luleleholimale ata kebia nahate valive. Isito lulelete kebia nahate vave. <sup>16</sup>La onole vamale kemo vaveve dua unaha vaseve. Kosealemo la hilokage novae vani kou vanie toela. <sup>17</sup>Lainaho luleleholimale kebia nahate vagelive. Isito Kosive isivi ke kaovai kemo lulelelahai ke vaseve. <sup>18</sup>Lainaho e toela isi tilogoalive. Lana kateige kena la aiogevei. Kate halevaito Munanae Tumu lahehi uale kemo negolahai ugeve. <sup>19</sup>Katelahaimoleho Bukae Hoto loui dubue nogoli lougeve. Isi nogoli kateale loui la uvumo enehavo dua vai Kosive hoesehavogeve. <sup>20</sup>Isi vani bahata nahie Kosive Iesu Keliso ke ivimo la vaveve bahatamo nahie Mama Dilava ke ivi ebagevai hoesehavogeve.

### Malahesi keateho deiada

<sup>21</sup>La Keliso vabuhavoi hoesehavomale kemo mole huhuevei mole isivi vaseve. <sup>22</sup>Keatea, la Kosive hoto evisi ehovamale ke nahate la kolivue hoto evisi isiviae vaseve. <sup>23</sup>Kosealemo Keliso keu ekalesiae kina holisi vaveve toelamo au ata maleveale ke nahate malahaeau keate kina holilu. <sup>24</sup>Katealemoike ekalesiau Keliso hoto evisi isivive vamale ke nahate keate abuna abu kolivue hoto bahata evisi isiviae vasei. <sup>25</sup>Malahaea, Kelisou ekalesiaho isiviae abuho hatiale ke nahate la mahinuvuho isivilahai tedaevegeve. <sup>26</sup>Kelisou hatiale kemo ekalesiae vaveve toela ulihanu. Keu kateai isivialeike abu hotove evisi babatisolahage au kebia malevei tumutievei. <sup>27</sup>Keu kateai isivialeike ekalesiae hoesegevege elike vaveveabe toela isi huhuihuwieabe toelau uoholige abu atae tumu holige auna bae au ebikaho kebia malevei.

<sup>28</sup>Malahaea, la ebika hoesegeveale ke nahate di isivialeike la keate hoesegeve dua vai isiviabemo tedaeveve. Malaha oleuoleu abu keateho isivilahai hoesegeve dua vale keabuna kemo abu ebikata hoesegevei. <sup>29</sup>Atabeu bae au vava aiohavolivebene. Isito auna au vava ke nalisi hoesehavoi. Ke nahate Kelisou au ekalesia nalievei hoesegevema. <sup>30</sup>Nahiau Keliso ata holisi vavave nahate holilu, Kemoike au nahie nalievema. <sup>31</sup>Kemoike Bukae Hotou loui avoe, “Malahesi molena au mamata au neinata halevei au keateti igaetoaniege avuti vava igae nahate vai.” <sup>32</sup>Mole holoeveale hoto kemo hoto mole seleveu ua. Hoto keu koseanu. Kelisou ekalesiae kebiahi igaetoale keu mole holoeveale ke nahate. <sup>33</sup>Deiada keu kateanu. Isito malahaea, la la vava hoesegeveale ke

nahate la keateho isivilahai hoesegeveve. Ige keatea, lata la kolivue hoto evisi isiviabe vave.

### Ese isi mamuvu neinuvu deiada

**6** <sup>1</sup>Esebuluia, Kosiveu isivialeike la la mamuvu neinuvue hoto evisi vave. La vaveve kateale vase duave. <sup>2-3</sup>Kosealemo Dilavau subuta menaka molemo loui loui avoe, “La mamuvu neinuvu kebia hoto evisi hoesegeveve.” Menaka kemo Dilavau hoto mole tumute loui loui avoe, “Lana katelahaliege vata komo ue dua vase la uvevena egeai.” <sup>4</sup>Ige mamuvu, neinuvuia, lainaho vani bahata la esevo hoto tolote lougelive. Lana katelahalage keabuna laheho itumulahai bae la hoto evilivebene. Isito Dilava hoto loui haiveve. Isi abu humaha hosidige kemo luleleabe vave.

<sup>5</sup>Heiata loviamale ataea, vatae kosive oleuoleu la malevege la abuemo lovilahaliege kebia hoto mai vabugevei hotoeabe evive. Lainaho kemo dolodololahagelive. Isito la Keliso hoto evisi hoesehavomale ke nahate kebia hoto evisi hoesegeveve. <sup>6</sup>Lainaho huhulahai kosea, “No kebia nimo lovie dua vase abu no elegevei no tabagevei.” Lainaho kateale huhulahagelive. Isito la Iesu Keliso esemu holiale kemo la uvu bahata mai Dilava omisi isivive vai vatae kosive kebia lovi vae dua vaseve. <sup>7</sup>Kosealemo laeau vatae kosive kebia lovi unaha vaholima. Isito la Iesu Keliso lovi vamale ke nahate vahaeho unahamo kosive kebia lovi vaseve. <sup>8</sup>La hilokage ata oleuoleu vaveve dua vamale ke ibina Kosivena ovei. Halege heiata loviamale, mesoho au ibinaho loviamale keau Dilava nimo mole nahate. Kosivena kebia bahata ibina ovei. <sup>9</sup>Ige ata nalievemale kosivea, lainaho la esemuho vabue vaveve hoto lougelive. Isito abu la hoesegevemale ke nahate lata kebia hoesegevegeve. La hilokage laeau laemo heiata loviamale kebiahi ehue Kosive ke nimo mole nahate. Kosive kena bae la bahatae vaveve kaovai laheho loui.

### Dilavau Setene lobo bamuveve onobenobe nahiovenu.

<sup>10</sup>Iale di haokuvuia, di hotoe gabi louge evive. Kosive kemo negolahai vuvuneve kemo ugeve. <sup>11</sup>La hilokage ataaebuna mole haveliho tilioge mole haveveve onobenobe malei tai. Ke nahate Dilavau Setene lobo ke bamuveve onobenobe laovenu. Iale hovedevei au laoveale kemo negolahai Setene loboe vaveve ke bamui uve. <sup>12</sup>Di louale keu koseanu. Nahiau ata haveveve ata holioholilu. Isito nahiau Seteneluvuta mole havei atavehi mole haveveve ataea. Setene munanae toela keau moaga. Degomoleau vatamo vuvune balugai vavie vaveve vama. Isege degomoleau otogomo vaveve toela vama. <sup>13</sup>Katealemo hovedevei Dilavau onobenobe laoveale ke bahata maleve. Lana katelahaliege vanie toelau laemo lohogelive lana kemo negolahai Setene vaveve ke bahata aegevealemo lavie dua vai.

<sup>14</sup>Iale hovedevei Dilavau laoveale ke malei la ebiamo hatuve. Hoto seleve keu beleta nahate. Iale beleta ke mai la unimo beive. Dilava vaveve inutolotolote keu ivuka bamumale ke nahate. Iale ke mai hatuge au la ivuka bamui. <sup>15</sup>Dilava uveve duae hoto mai tai ata haivemale keu veloe vate nahate. Iale ke malei velomo otovave. <sup>16</sup>La evievi keu mihihi nahate. Iale lana ke mai la ebia bamuge Setene bi vuvuneteu bae laemo dalivebene. <sup>17</sup>Ige Dilavau hatihatimo nahie maleveale keu tuvali saneka nahate. Iale saneka ke mai la kina hanubeve. Ige Dilava hoto keu benisi nahate. Iale Dilava Munanae Tumu hoto ke mai laoveale ke mataha tumuave.

<sup>18</sup>Vaveve ke bahata vai vani bahata guligulilahai Dilava imihageve. Lainaho guliguli ke kabibihavogelive. Isito Dilava Munanae Tumue vuvunemo negolahai Dilava ata bahataho Dilava imihage au kebia tedaevei. <sup>19</sup>Isi dataho gulililahave. Ige Dilavau dahoe humaha alavoge di vabu haleito negoai hotove loui kove ata haivei. Di isivialeike negoai Dilavau subuta hoto mahogovale ke loui ata haivege abu ke evisi hilokai. <sup>20</sup>Di subuta hoto ke loui ata haiveike valage abu di mai dibulae mavoge di aike dibulae ua. Isito dahoe guligulilahage elike di vabuholisito negoai hoto ke loui ata haivegei.

### Hotoe gabi

<sup>21</sup>Di deiadau kemo kateai ua. Isito di hoto molehame louge evive. Nahie uvue haoka, Tikikasi kena bae di vaveve bahata loui la haivei. Keu Kosive lovimo negoimale ata. <sup>22</sup>Katealemo dana ke hanavoge auna lae tai. Di isivialeike au di vaveve bahata loui la haivei la uvu mai negotievei. <sup>23</sup>Di hotou gabianu. Isito di isivialeike nahie Mania Dilava isi nahie Kosive Iesu Keliso keau uveve dua mai laovege lana la evievimo negolahai moleho isivilahai mole tedaevegeve. <sup>24</sup>Ata oleouole suleveta abu uvu mai nahie Kosive Iesu Keliso kemo mavoge di isivialeike Dilavau kebia huhuevei hoesegevei.